



Rabu, 24 Juli 2024

Ogen: Lukas 10:42



Milih Si Mehuli



I bas tep-tep situasi kita lalap ibabai ku bas sada pilihan. Janah arus tetap lit si pilih i bas ndalani kegeluhen. Umpamana, medak erpagi pagi, lit pilihan mis ndahiken dahin rutinitas entah ertoto lebe. Guna kesehaten perlu man nakan entah cukup minem susu ras roti saja. Lawes erdahin, naik angkot entah cukup jalan kaki. I bas erdahin perlu mbue ngerana entah cukup sinik saja tapi dahiken dahin e ras sidebanna. Alu la isedari, tiap wari situhuna kita arus muat keputusan siapai si man pilihan. I bas si e megaiti pe kita salah muat pilihan si tepat.

I bas percakapen Jesus ras Marta, isingetken Jesus maka Maria enggo milih si mehuli, janah lanai banci buat i bas ia nari. Milih si mehuli ertina lit denga pilihan sideban. Banci saja siteriahen tapi lenga tentu mehuli man bana paksa si e. Engkai maka ikataken Jesus maka Maria enggo milih si mehuli? Jumpa dengen ercakap-cakap ras Jesus, maba ketenengen ras kemalemen ate. Labo rusur Jesus reh ku rumahna lako ercakap-cakap ras ia. Tupung Jesus i je, pakekenlah kundul ras-ras dengen megiken pengajarena. Dahin sideban banci kari ka dahiken. Maria nikapken pusuhna megiken kata pedah Jesus. Kata e akapna si mereken keriahen ras kegeluhen man bana. Jesus pe ngidah pusuh si ermetedeh ate megiken dengen ercakap-cakap ras IA. Bagem perluna pentar, meteh kai si arus ilakoken i bas paksa si tepat. I tengah-tengah pilihan si arus si buat, ukuri kai si terpenting. Hubungenta pribadi ras Tuhan e cukup penting. Ia me si mereken ketenengen ngalaken erbage-bage situasi kegeluhen.

Pilihlah si erbahansa ukur teneng